

楊焜顯：阿媽的舊壁鐘

(桃紅字：表聲音內容)

著香煙的香環
吊佇神明廳大樑下
香火恬恬仔衝芳
日本時代火化去囉
光復了後，壁鐘的發條
猶原是驚惶的心跳

B-29 飛走 飛來 F-104 加農砲向天顧更
仝款疏開離鄉枵過飢的鄉親失神無眠
無仝國名的時代
無仝哭調的時代
仝款消化不良溢赤酸的腹腸透暝滾絞
中氣袂順肝火當炎苦喙舌紅目暘過日

有耳無喙的非常時局
逐家攏是囚仔人，大人
街頭巷尾高高在上，看懸
無看低的頷頸，向天揭手行禮
手會麻會掣，真酸真疼含目墘
早慢炎日的苦早會真正過去

該死的陽剛聖旨
追殺民間的少年英雄
波波白的海湧中浮浮沉沉
陽世的女性主義
疼顧陰間早死的英魂
肩胛頭有深情，有道義的腰脊骨

歷史冊反來反去算東算西
青春啊有啥人仝輸真贏
壁鐘的發條冗去，時運放空
著香煙的香環
吊佇神主牌頭前
恬恬仔衝芳 安魂